

江氏离骚傳

江氏藏書

新

鑒

江
得



江氏離騷傳卷第一

長井江術學

離騷經

洪興祖注引釋文無經字文選第三十二騷上屈平

離騷經一首九歌四首第三十三騷下屈平九歌二

首九章一首卜居一首漁父一首宋玉九辯五首招

魂一首劉安招隱士一首共王逸注後漢文苑傳王

逸字叔師南郡宜城人元初中舉上計吏爲校書郎

順帝時爲侍中著楚辭章句行於世漢藝文志賦二

十家屈原賦二十五篇曰春秋之後周道寤壞聘問

歌詠不行於列國學詩之士逸在布衣而賢人失志之賦作矣大儒孫卿及楚臣屈原離讒憂國皆作賦以風咸有惻隱古詩之義今楚辭離騷經第一九歌第二天問第三九章第四遠遊第五卜居第六漁父第七九辯第八招魂第九大招第十其中九辯宋玉大招或言景差自離騷經至大招併大招二十五篇合漢志之數史記屈原傳故憂愁幽思而作離騷離騷者猶離憂也索隱悞又作騷按楚詞悞作騷音素刀反應劭云離遭也騷憂也王逸序憂心煩亂不知所翹乃作離騷經離別也騷愁也經徑也言已放逐

離別中心愁思猶依道徑以風諫君也說文離黃倉
庚也鳴則蠶生从佳离聲騷擾也一曰摩馬从馬蚤
聲周易離彖曰離麗也日月麗乎天百穀草木麗乎
土重明以麗乎正乃化成天下象曰明兩作離大人
以繼明照于四方說卦相見乎離又曰離也者明也
萬物皆相見南方之卦也聖人南面而聽天下嚮明
而治蓋取諸此也離明兩作故曰相見乾九二見龍
在田利見大人九五飛龍在天利見大人是也聽也
者坎之事也離爲火坎爲水治亦謂水也乾坤用坎
離故曰南面而聽天下嚮明而治作亦謂水也訟象

曰天與水違行訟君子以作事謀始廣韻離竝郎計
切音麗麗入聲爲列爲歷招魂離離榑幕注列也國
語晉語非天不離數注歷也史記天官書月所離列
宿索隱引韋昭同穀梁定十年傳離會不致注二國
會曰離公羊桓二年傳離不言會注同之禮曲禮上
離坐離立注離兩也管子乘馬四聚爲一離白虎通
嫁娶離皮者兩皮也離騷者離憂也言宜二國相會
兩以相濟而今不能乃然者所以其遭憂也爾雅釋
親出之子爲離孫釋名釋親屬出之子曰離孫言遠
離已也論語季氏邦分崩離析孔注不可會聚曰離

析凡古語兩端者多一語二義相反離附也分也離
騷者離之憂也遭之憂也不遭之憂也宜遭而不遭
與不宜遭而遭者其憂一也熊渠生子三人當周夷
王之時王室式微諸侯或不朝相伐熊渠甚得江漢
閒民和乃興師伐庸楊粵至于鄂熊渠曰我蠻夷也
不與中國之號謚乃立其長子康爲句亶王中子紅
爲鄂王少子執疵爲越章王皆在江上楚蠻之地宜
遭而不遭一也武王三十五年伐隨隨曰我無罪楚
曰我蠻夷也今諸侯皆爲叛相侵或相殺我有敝甲
欲以觀中國之政請王室尊吾號隨人爲之周請尊

楚王室不聽還報楚三十七年楚熊通怒曰吾先鬻
熊文王之師也蚤終成王舉我先公乃以子男田令
居楚蠻夷皆率服而王不加位我自尊耳乃自立爲
武王與隨人盟而去於是始開濮地而有之不宜遭
而遭一也莊敖五年欲殺其弟熊惲惲奔隨與隨襲
弑莊敖代立是爲成王不宜遭而遭二也成王十六
年齊桓公以兵侵楚至徑山楚成王使將軍屈完以
兵禦之與桓公盟桓公數以周之賦不入王室楚許
之乃去不宜遭而遭三也三十三年宋襄公欲爲盟
會召楚楚王怒曰召我我將好往襲辱之遂行至盂

遂執辱宋公已而歸之宜遭而不遭二也初成王將以商臣爲太子令尹子上諫之不聽立之後又欲立子職而紕太子商臣商臣以告其傅潘崇崇曰能事之乎曰不能能亡去乎曰不能能行大事乎曰能商臣以宮衛兵圍成王成王請食熊蹯而死不聽成王自絞殺商臣臣代立是爲穆王不宜遭而遭四也從是其後宜遭而不遭與不宜遭而遭無代無之離騷者猶離憂也春秋之義立子以嫡不以賢令尹子上曰楚國之舉常在少者集解賈逵曰舉立也莊王八年伐陸渾戎遂至洛觀兵於周郊周定王使王孫滿勞

楚王楚王問辭於大輕重曰在德不在鼎莊王曰
子無阻九鼎楚國折鉤之喙足以爲九鼎申包胥走
秦告急救於秦秦哀公曰楚雖無道有臣若是可
無存乎楚無道與周制自別昭王病於軍中有赤雲
如烏夾日而蜚昭王問周太史太史曰是害於楚王
卜而河爲祟大夫請禱河昭王曰自吾先王受封望
不過江漢而河非所獲罪也止不許楚彊陵江漢閒
小國小國皆畏之其民與河洛種屬自別本與齊及
吳越同種說具後懷王之時蘇秦約從六國共攻秦
楚懷王爲從長楚與齊從親最得天然秦之所患亦

是故乃宣言張儀免相使張儀南見楚王謂楚王曰
敝邑之王所甚說者無先大王雖儀之所甚願爲門
闥之廝者亦無先大王敝邑之王所甚憎者無先齊
王雖儀之所甚憎者亦無先齊王而大王和之是以
敝邑之王不得事王而令儀亦不得爲門闥之廝也
王爲儀閉關而絕齊今使使者從儀西取故秦所分
楚商於之地方六百里如是則齊弱矣是北弱齊西
德於秦私商於以爲富此一計而三利俱至也懷王
大悅乃置相璽於張儀日與置酒宣言吾復得吾商
於之地羣臣皆賀而陳軫獨弔懷王曰何故陳軫對

曰秦之所爲重王者以王之有齊也今地未可得而
齊交先絕是楚孤也夫秦又何重孤國哉必輕楚矣
楚之不宜遭而遭宜遭而不遭無甚於此離騷之所
以作也離騷爲楚作非爲屈原作其生死存亡之故
皆非一人之謂也離爲火爲日爲電爲中女爲甲冑
爲戈兵其於人也爲大腹爲乾卦爲鼈爲蟹爲羸爲
蚌爲龜其於木也爲科上槁說文楚叢木一名荆也
从林疋聲周禮莖氏掌共燹契注楚煇卽契所用灼
龜也釋名釋州國楚辛也其地蠻多而人性急數有
戰爭相爭相害辛楚之禍也韓詩楚地在南郡南陽

之間詩殷武奮伐荆楚離騷者楚騷也方言八驪黃
自關而西或謂之楚雀騷擾也一曰摩馬方言六騷
蹇也吳楚偏蹇曰騷騷摩馬二馬相摩也今日離蹇
溇也爾雅釋訓溇溇淅也孫注溇溇淅米聲注溇洮
米聲淅摩米也猶騷摩馬也字皆从蚤騷之言又藻
也藻竝子皓切音早早通作蚤說文藻水草也从艸
从水巢聲詩曰于以采藻或从澡書益稷藻火傳藻
水草有文者離騷者楚騷也楚騷者楚藻也楚之有
騷猶詩之有雅頌也頌之變也故不言雅言騷騷藻
也有文者禹貢荆及衡陽惟荊州江漢朝宗于海九

江孔殷沱潛旣道雲土夢作又楚爲澤國其祖居火
正釋名釋州國荊州取名於荊山也必取荊爲名者
荊警也南蠻數爲寇逆其民有道後服無道先彊常
警備之也韓詩外傳當舜之時有苗不服其不服者
衡山在南岐山在北左洞庭之陂右彭澤之水由此
險也以其不服禹請伐之公羊僖四年傳楚有王者
則先服無王者則先叛史記范雎蔡澤傳成荊集解
引徐廣荊一作羌荊舉卿切羌去羊切荊轉羌說文
羌西戎牧羊人也从人从羊羊亦聲南方蠻閩从虫
北方狄从犬東方貉从豸西方羌从羊此六種也西

南蠻人僬僂从人蓋在坤地頗有順理之性唯東夷
从大大人也夷俗仁仁者壽有君子不死之國孔子
曰道不行欲之九夷乘桴浮於海有以也嶽古文羌
如此書牧誓及庸蜀羌髳微盧彭濮人傳八國皆蠻
夷戎狄羌在西蜀叟史記匈奴傳西接月氏氏羌索
隱引續漢書云羌三苗姜姓之別舜徙于三危今河
關之西南羌是也姜姓卽夷楚王好自稱蠻夷廣雅
釋詁羌强也春秋元命苞荆之爲言强也陽盛物堅
其氣急悍也爾雅釋地李注荊州其氣燥剛稟性疆
梁故曰荊荆疆也論語楚狂接輿疑狂亦荆之轉强

狂聲相近也荆姓燕有荆軻望出廣陵序經徑也非是說文經織也从糸至聲經織也故言經者必有對偶織綜成文矣如周易上下經今唯離騷經一首而已一首而言經者離也騷也騷摩馬也二馬相摩也猶織也吳楚偏蹇曰騷騷蹇也經一首是其義楚之有騷猶詩之有雅頌也雅頌之變也

帝高陽之苗裔兮朕皇考曰伯庸攝提貞于孟陬兮惟庚寅吾以降

首楚自言也史記楚世家楚之先祖出帝顓頊高陽高陽者黃帝之孫昌意之子也高陽生稱稱生卷章